

■ OR DA LA VITA DA LUDMILLA CAHENZLI

25 pèra chalzers l'onn normal

Quai na dastga Eugen Cahenzli betg savair. Jau, Ludmilla Cahenzli, cumpr mintg'onn 25 pèra chalzers. Ils pes da mes trais uffants creschan en in tempo nar.

Probabel nagin che crai. Ma dacurt è mes mat vegnì ed ha ditg: «Mamma, mes chalzers da gimnastica èn memia pitschens.»

«Nunpussaivel. Nus avain gea cumprà els pir avant dus mais», di jau.

Ma mes mat insista: «Els fan mal.»

Jau m'enclin e smatg orasum ses chalzers. Avant dus mais era il polesch trais centimeters d'avent dal piz dal chalzer. Jau ma regord anc bain che la vendidra da chalzers aveva ditg: «Quests chalzers èn bler memia gronds. Voss mat va gea en venter uschia.»

Jau hai tuttina cumprà exact quests chalzers. Durant tippar e pachetar en ils chalzers ha la vendidra fatg ina tschera sco sch'jau fiss la mendra raffadra e sco sch'jau maltarschinass mes uffant a moda crudaivla.

Ussa turnass jau gugent cun il mat en stizun e schess a la vendidra: «Tutgai ina giada e guardai, nua ch'il polesch è! Tge schais ussa?!» Ella na ma cartess betg ch'il mat, ch'emplenetscha oz ils chalzers, è il medem che aveva avant dus mais sia deta-pe trais centimeters d'avent dal piz dals chalzers.

Mender che la vendidra è dentant Eugen Cahenzli. A mes um na dastg jau betg dir ch'jau stoss puspè comprar chalzers. El survegn uschiglio in'attatga. Eugen pensa ch'jau cumpria bler memia blers chalzers. Dasperas sa el gea be da la mesadad dals chalzers. L'autra mesadad cumpr jau en il zuppà. Eugen senta zuar vi da las finanzas ch'insatge na constat betg, ed el dumonda mintgatant: «Has ti insanua in conto, nua che ti mettas da la vart daners?» Ma jau respund adina cun eglis gross: «Na, segir betg». La vardad è ch'ils daners svaneschan en las stizuns da chalzers.

Dacurt hai jau ina giada fatg ina glis-ta. Jau hai quintà ora quants chalzers ch'jau cumpr en media entaifer in onn. Sco gia ditg, igl è 25 pèra. Ils blers che legian questa cifra scurlattan uss il chau



ILLUSTRATURA YVONNE GIENAL/WWW.YVONNE-GIENAL.CH

e pensan: «Questa Ludmilla Cahenzli batta cumplet. Ella ha probabel la malsogna da comprar chalzers.» Ma mintga mamma cun trais uffants sa exact che 25 chalzers ad onn n'è insumma betg stravagà.

Dal reminent: sch'jau avess la malsogna da comprar chalzers, cumprass jau gea 30 pèra be per mamezza. Ma jau cumpr be circa traia pèra chalzers per mai. Il rest è per ils uffants.

Ludmilla Cahenzli

PS: Eugen dovra be 0,2 pèra chalzers l'onn – pia mintga tschintg onns in pèr novs. E damai ch'el na va betg sez a comprar quels, n'ha el gnanca la minima idea tge che chalzers custan insumma ozendi. El crai fermamain che buns chalzers da tgirom custian enturn 50 francs.

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria